



Podcast Borak Harini

Tiada maaf kakitangan
DBKL makan rasuah:
Maimunah

Nasional 12, 13

Siasat surat layang aduan rasuah pastikan integriti DBKL

Komitmen awal dizahirkan Datuk Bandar Kuala Lumpur wanita pertama, Datuk Seri Dr Maimunah Mohd Sharif selepas dilantik jawatan itu pada 15 Ogos lalu adalah tidak bertoleransi terhadap isu rasuah dan penyalahgunaan kuasa pegawai serta anggota penguat kuasa Dewan Bandaraya Kuala Lumpur (DBKL). Selepas sebulan menduduki kerusi Datuk Bandar, bekas Penasihat Majlis Antarabangsa Inisiatif Alam Sekitar Tempatan (ICLEI) itu turut menumpukan aspek pembersihan Kuala Lumpur daripada penguasaan peniaga warga asing, transformasi ibu negara sebagai bandar raya selamat dan berdaya huni.



Oleh Suzalina Halid
suzalina@bh.com.my

Kuala Lumpur:

Dalam usaha melaksanakan sifar toleransi terhadap rasuah membabitkan kakitangan Dewan Bandaraya Kuala Lumpur (DBKL), Datuk Bandar Kuala Lumpur, Datuk Seri Dr Maimunah Mohd Sharif bertekad akan menyiasat sebarang laporan berhubung salah laku itu walaupun maklumat disampaikan melalui surat layang. Langkah itu dilaksanakan bagi menzahirkan betapa seriusnya

beliau hendak menangani isu rasuah membabitkan kakitangan DBKL. Atas faktor itu, jika aduan diterima terbukti benar, beliau tidak teragak-agak akan mengambil tindakan tegas terhadap golongan terbabit.

“Saya tidak bertoleransi kalau ada aduan dan terbukti pegawai mengambil rasuah, kita akan mengambil tindakan sepenuhnya.

“Walau surat layang sekalipun kita akan mengambil tindakan. Kalau tiada angin, masakan pokok bergoyang. Setiap apa saya terima, tidak akan dimasukkan dalam fail sahaja.

“Ia tetap disemak sebelum prosedur susulan dilaksanakan bagi memberi gambaran saya serius dalam hal ini,” katanya menerusi program Podcast BH,

Borak Hari Ini bertajuk *Kuala Lumpur di Tangan Maimunah*, baru-baru ini.

Pada masa sama, Maimunah berkata, dalam menutup ruang untuk berlaku rasuah, pasukannya sedang melihat jika wujud kelompangan pada sebarang prosedur urusan dengan DBKL.

Tambah baik SOP penyampaian

Beliau berkata, prosedur operasi standard (SOP) dalam penyampaian perkhidmatan DBKL juga akan ditambah baik bagi memastikan tiada ruang untuk penawaran bagi sebarang habuan.

“Ketika hari pertama sidang media iaitu hari sama enam kakitangan DBKL dihadapkan di mahkamah, saya nyatakan prinsip saya adalah sifar toleransi terha-

dap rasuah.

“Kita ada pegawai Suruhanjaya Pencegahan Rasuah Malaysia (SPRM) dalam Jabatan Integriti DBKL perlu mendidik rasuah itu tidak elok, jangan ambil.

“Jika tiada orang memberi maka tiada menerima. Kalau SOP baik dari segi kelulusan (lesen), maka tiada ruang hendak beri habuan lagi,” katanya sambil menambah mana-mana pihak mempunyai isu berkaitan proses pendaftaran lesen atau adanya halangan boleh tampil kepadanya memberikan maklumat.

Sementara itu, bagi memastikan sesuatu agensi itu baik pentadbirannya, beliau berkata, ia harus bermula pada peringkat

atas, membabitkan ketua jabatan yang mana mereka adalah pihak perlu memainkan peranan.

“Paling penting adalah ketua jabatan perlu bersih kerana ia bermula dari atas, bukan di bawah. Kalau di atas elok, bawah pun akan jadi elok,” katanya.

Sebelum ini, timbalan pengarah dan pegawai penguat kuasa DBKL didakwa di Mahkamah Sesyen Kuala Lumpur atas dua pertuduhan meminta dan menerima rasuah daripada penjaga pusat hiburan tanpa lesen.

Mahkamah Sesyen di sini turut menjatuhkan hukuman denda RM13,000 terhadap seorang pembantu penguat kuasa DBKL atas lima pertuduhan kerana melindungi premis menggunakan lesen Ali Baba

pada 15 Ogos lalu.

Sementara itu, Maimunah berkata, pihaknya akan membatalkan serta-merta lesen premis perniagaan milik peniaga tempatan disewakan kepada warga asing.

Amaran itu diberikan beliau kepada peniaga tempatan yang terbabit dalam aktiviti ‘Ali Baba’. “Kalau jumpa lesen ‘dialibabakan’ dan ada bukti, kita akan batalkan serta-merta.

“Kita bagi lesen murah, gerai bagi sewa murah sekali dengan kemudahan air dan elektrik. Dia nak senang tidak mahu berniaga hendak dapat RM1,000 hingga RM2,000 sebulan (hasil sewakan lesen) dan mereka sewa dapat RM10,000, bagi saya tidak patut,” katanya.



Pengerusi Kumpulan Media Prima, Datuk Seri Dr Syed Hussian Aljunid (kiri) bersama Pengarang Urusan Kumpulan The New Straits Times Press (M) Berhad (NSTP), Datuk Ahmad Zaini Kamaruzzaman dan Timbalan Pengarang Kumpulan BH, M Thilindan (dua dari kiri) mengiringi Maimunah ketika hadir pada program Podcast BH, Borak Hari Ini di Balai Berita Bangsar. (Foto Asyraf Hamzah/BH)